

**Seni Preseten  
Dieter F. Uchtdorf**

Aruemonun Chon Aninis  
non ewe Aewin Presetensi



# Fein Fetan

**K**a fen rongorong an aramas apasa, ika pwe ka rikino a ussun nge ka chok fein fetan? Jan L. Souman, emon soutipechem seni Germany, a mochen sinei ika mi ennet an aramas apasa ei. Iwe, a tingor ngeni ekkoch aramas pwe repwe feino nepetewen me ekkoch ar repwe feino non ewe fonupon a iteni Sahara, o a pwan fori ew mwesin ika satanait pwe epwe tongeni kuna ekkewe aramas ekkis meinisin repwe feino ia. Ekkewe aramas rese uwei kompes are map. An osukun ngenir mi fakkun mecheres: a erenir pwe repwe chok fetan wenechar, resap rikino.

Dr. Souman a aporaus minne a fis ngenir. “[Ekkoch] ra fetan nupwen a raningaw, ewe akkar a nom non ekkewe kuchu [ese wor pisekin aninis ika och mettoch a tongeni anisir ne fetan wenechar.] . . . [Ra] chok fein fetan, rese wenechar non ar fetan me [chommong] neir rese esinna pwe ra fen niwiniti ewe neni ikewe ra poputa me ia.” Pwan ekkoch ra fetan nupwen a ranoch, ra tongeni kuner me pwan kuna mettoch mi touwau ra tongeni fetan ngeni. “Ekkei aramas . . . ra fokkun wenechar non ar fetan rese kan rikino.”<sup>1</sup>

Chommong aramas mi tipechem ra pwan fori minne Dr. Souman a fori.<sup>2</sup> Mi chok nonno met a fis.

Ika ese wor pisekin aninis sia tongeni kuna, iwe kich aramas sipwe chok fein fetan.

## **Ekkewe Pukfel ina ew Pisekin Aninis**

Ika ese wor pisekin aninis non pekin ngun, iwe kich sipwe pwan rikino. Ika ese wor kapasen Kot, iwe sipwe chok fein fetan.

Emon me emon pwan non muu meinisin, non iteiten kinikinin fansoun seni nepoputan fonufan a fis ei sokkun napanap. Ika sise chuwen aneasosichi ewe kapasen Kot, iwe sipwe rikino.

Iei popun ewe Samon a annuku ngeni Lehi pwe epwe tinano noun kewe anuon ngeni Jerusalem pwe repwe angei ekkewe chon seneich mi for seni piras. Kot a fen sinei mi namwot ngeni mwirimwirin Lehi kewe pwe repwe nengeniochu ekkei pisekin aninis—mettoch ra tongeni kuna—pwe epwe emwenir o anisir pwe repwe tongeni fetan wenechar.

Ekkewe pukfel mi ewe kapasen Kot. Ir an Kot aninis mi tongeni pwarata ngenikich anen ach sipwe anneasosich pwe sipwe kanengeni ach we Samon.

## **Mwichenapen Mwichefen ina pwan ew Pisekin Aninis**

Ewe pesepes sia angei seni mwichenapen mwichefen ina pwan ew pisekin aninis epwe anisikich ne fetan wenechar.

Fan ekkoch ua pwisin eisinie, “Met, Ngang mi ausening ngeni ekkewe chon afanafan non ewe

mwichenapen Mwichefen? Ngang mi annea me annea-asefani met ra aani afanafan? Ngang mi ekipwichi me manaueni ar afanafan? Are ngang mi chok pwapwaiti ekkewe afanafan mi amwarar nge use manaueni non pwisin manaueni?”

Meni nupwen ka ausening ika annea, ka makkeitiw mefiom. Naman ka mochen aochu manauen om so-uneng. Sotun mwo ekieki usun ekkewe afanafan seni mwichenapen mwichefen sia fen rongorong. Chommong ra pesei ngenikich pwe sipwe apochokuna ach kewe famini me apochokuna ach pupunu. Non ei maram ewe *Liahona* mi aucheani ekkei mettoch mi amwarar, me a pwan awora aninis pwe sipwe aochu manauach.

Nge sia pwan aucheani o manaueni met a aani pesepes ngenikich? Kich mi esinna me aea ekkei pisekin aninis pwe sipwe tongeni fetan wenechar?

### Ewe Safeen Fein Fetan

Ekkei pisekin aninis mi namwot ne anisikich pwe sipwe fetannofoch won ewe an mi wenechar me chokisokis. Mi pwan afata ngenikich ia sipwe feino ia—nge mi kon auchea pwe sipwe esinna me fetan ngeni ekkei pisekin aninis.

Ika sise aeaochu ekkei pisekin aninis, iwe repwe chok mettoch mi ningoch nge ra namwotongaw ngenikich.

Ese tufich ach sipwe wenechar ne fetan ren chok pochokunen inisich.

Ese kan naf ina mwo ika mi murrino ekiekin non netipach.

Ese pwan tufich ach sipwe apinukunuku ach pwisin pochokun.

Ika mwo sia ekieki pwe sia fetan won ewe an mi wenechar, ika sise tapweno mwirin ekkei pisekin aninis—are ewe Ngun mi Fel ese emwenikich—iwe sipwe chok fein fetan non manauach.

Iwe, sipwe kan anenoi mesach me kuna ekkei pisekin aninis ach Kot mi napanap a fen awora ngeni Noun kewe aramas. Sipwe annea, ausening, me manaueni ewe kapasen Kot. Sipwe iotek ren unusen netipach me auseningoch ngeni memmefan ewe Ngun mi Fel. Nupwen sia esinna ekkei pisekin aninis mi amwarar seni Semach won Nang, sipwe achocho ne fetan ngenir. Sipwe fakkun tipepos ne fetan wenechar ngeni ekkei pisekin aninis non pekin ngun.

Ika sia fori ena, sisap chiwen fein fetan nge sipwe chok fetan non pochokun ngeni ekkewe feioch mi napanap Kot epwe fang ngeni ekkewe ir mi fetan won anen noun Kraist kewe chon kaeo.

### ESINESIN

1. Ngeni Jan L. Souman me pwan ekkoch, “Walking Straight into Circles,” *Current Biology*, vol. 19 (Sept. 29, 2009), 1538–42.
2. Ngeni, Robert Krulwich, “Mi monomon: Pwata sise tongeni fetan wenechar?” [npr.org/blogs/krulwich/2011/06/01/131050832/a-mystery-why-can-t-we-walk-straight](http://npr.org/blogs/krulwich/2011/06/01/131050832/a-mystery-why-can-t-we-walk-straight).

### AFANAFAN SENI EI POROUS

Nupwen oua ammonata ami afanafan, oua tongeni kutta non ekkewe pukfel porausen aramas mi fetan ngeni o aea pisekin aninis seni Kot are porausen aramas mi chok fein fetan non manauer. Ka tongeni poputani om kaeo ngeni pukfel ren ekkei wokisin: Numbers 14:26–33; 1 Nifai 16:28–29; Alma 37:38–47. Ika ka mefi Ngun mi Fel, ka tongeni aporausana ngeni ekkewe aramas ka afanafana ussun met ka kaeo seni ekkei wokisin. Kopwe eisinir met sia tongeni kaeo seni ekkei wokisin ika tuttunap non pukfel.

## SERAFO

### Pisekin Aninis Fan Itom

**P**reseten Uchtdorf a kapas ussun mwichenapen mwichefen me ekkewe pukfel, ekkei pisekin aninis repwe anisikich pwe sisap fein fetan non manauen ach souneng. Kopwe ekieki ussun ekkewe ekkoch pisekin aninis mi pwan emwenuk non manauom. Makkei met ka kaeo non noum puken achechem. A mak fan anon Preseten Thomas S. Monson mi tongeni anisuk:

“Om we efeioch seni petriark epwe anisuk non ewe pwiin mi fakkun kiroch. Epwe emwenuk non osukosuken manauom. . . . Om we efeioch esap chok numifengen me nonnom non nenian we chok. Esap pacheta non imw are kapini won taropwe. Iwe nge, epwe annea. Sipwe tongei. Sipwe tapweno mwirin kapasan.”  
“Your Patriarchal Blessing: A Liahona of Light.” *Ensign*, Nov. 1986, 66.

“Semach won Nang esap tinikicheto ika ese akkom awora pisekin aninis mi tongeni emwenikich pwe sipwe niwinsefan non kinamwe. Ua kapas ussun iotek. Ua pwan kapas ussun anon ewe mongungu mi pwetete.”  
“Ewe Kitirin Manau,” *Liahona*, May 2012, 92.

### Ngang mi Kuna ewe An

**P**reseten Uchtdorf a apasa pwe sipwe tapweno mwirin ekkei pisekin aninis pun repwe anisikich ne fori minne mi pung pwe sipwe arap ngeni ach we Chon Amanau. Ekkoch ekkei pisekin aninis, iotek, pukfel, mwichenapen mwichefen, me pwan ewe *Liahona*.

En me om famini, ami oupwe annea ew afanafan seni ewe mwichenapen mwichefen a keran fis. Met ewe chon afanafan a era sipwe fori pwe epwe anisikich ne fetan won ewe an mi wenechar? Non om famini oupwe anisifengenikemi pwe oupwe manaueni minne oua kaeo.



Nuku, Famini, Aninis

# Sipwe Pwapwaiti Uruon ach Famini

*Kopwe anneani ekkei mettoch iwe, nupwen mi och, kopwe aporausa ren ekkewe fefin ka churir. Kopwe aea ekkewe kapas eis ne anisuk ne apochokuna ekkewe fefin ka churir me pwan aochu manauom ren aean Fin Anisi. Ren pwan ekkis poraus, kopwe nengeni www.reliefsociety.lds.org.*

**E**lter Russell M. Nelson seni ewe Mwichen Engon me Ruemon Aposel a aiti ngenikich pwe ngunun Elijah ina an ewe Ngun mi Fel a pwarata ussun napanapen famini mi amwarar.<sup>1</sup>

Kich chon an Kraist Mwichen mi niwito, wisach pwe sipwe achocho ne kutta ach kewe newo me fori ekkewe efeioch non ewe kapas allim fan iter. Ika esap punun kich rese tongeni “unusochuno” (Hebrews 11:40), me ika esap pwan pokiten ir mi fen mano, sise tongeni unusochuno (D&C 128:15).

Angangen uruon famini a amonakicheta ren ekkewe feiochun manau ese much me a anisikich pwe sipwe chok fefeira non ach nukunuk. Uruon famini ina ew angang mi auchea non ewe Mwichen me a atufichi ewe angangen manau ese much ngeni aramas meinisin.

Preseten Boyd K. Packer, Presetenin ewe Mwichen Engon me Ruemon Aposel, a apasa, “Nupwen

fansoun sia sinei tetenin ach famini sia pwan mochen pwisin sineiochu chon ach famini esap chok iter. . . . Ach mochen sinei a kunnu netipach ngeni semach—sia kutter me mochen sineir me achocho ne anisir.”<sup>2</sup>

## Seni ekkewe Pukfel

Malachi 4:5–6; 1 Corinth 15:29; D&C 124:28–36; 128:15

## Seni Ach Uruo

Ewe Soufos Joseph Smith a aiti ngenikich, “Wisach we mi napanap Kot a ewisa ngenikich pwe sipwe achocho ne anisi ekkewe ra fen mano.”<sup>3</sup> Sia tongeni feino ngeni tempel me fori ekkewe angang mi pin fan iten chon ach kewe famini mi fen mano.

Sally Randall seni Nauvoo, Illinois, a fakkun kinamwe ren an sinei pwe famini ese much pun noun we at a mano nupwen a 14 ierin. Mwirin punuan a papatais fan iten nour we at, a mak ngeni an kewe

eterenges: “Ifa me amwararen ei feioch . . . pwe sia tongeni papatais fan iten ach kewe [newo] mi fen mano me anisi meinisin ir kich mi sinei.” Iwe a pwan tingorei an kewe eterenges pwe repwe ngeni ii porausen ar kewe newo, me a apasa, “Upwe fori ukkukun ai tufich pwe upwe anisi [ach famini].”<sup>4</sup>

### ESINESIN

1. Russell M. Nelson, “A New Harvest Time,” *Liahona*, July 1998, 34.
2. Boyd K. Packer, “Your Family History: Getting Started,” *Liahona*, Nov. 2011, 17.
3. *Teachings of Presidents of the Church: Joseph Smith* (2007), 475.
4. Nengeni *Daughters in My Kingdom: The History and Work of Relief Society* (2011), 20–21.

### Met Ua Tongeni Fori?

1. Epwe Ifa ussun ai upwe anisi ekkewe fefin fan ai tumun ar repwe fori uruon famini?
2. Ngang mi makkeitiw porausen nonnomun manauoi?